

DOCUMENTO INFORMATIVO SOBRE A IDENTIFICACIÓN EQUINA PARA O CONSELLO GALEGO DE COLEXIOS VETERINARIOS

17 novembro 2010

Modificacións sobre versión anterior marcadas en vermello

ÍNDICE

-CUESTIÓNS PREVIAS

-PROCEDIMENTO DE IDENTIFICACIÓN

-OUTROS ASPECTOS DE INTERESE

- A) SOLICITUDE DE IDENTIFICACIÓN
- B) CAMBIOS DE PROPIETARIO
- C) EMISIÓN DUN DOCUMENTO DE IDENTIFICACIÓN EQUINA DUPLICADO
- D) EMISIÓN DUN DOCUMENTO DE IDENTIFICACIÓN SUBSTITUTIVO
- E) RETRASO NA ENTREGA DOS DIE
- F) XESTIÓN DA IDENTIFICACIÓN EN ANIMAIS CON LISE
- G) XESTION DA IDENTIFICACIÓN EN ANIMALES QUE XA POSÚEN LISE E MICROCHIP
- H) XESTIÓN DE ANIMAIS IDENTIFICADOS PREVIAMENTE CON LIBRO DE IDENTIFICACIÓN CABALLAR (LIC)
- I) OUTROS SISTEMAS DE IDENTIFICACIÓN
- J) DILIXENCIADO E REVALIDACIÓN DOS DIE
- K) INFORMACIÓN SOBRE DOCUMENTACIÓN DE MOVEMENTO DOS ÉQUIDOS.
- L) INFORMACIÓN SOBRE MORTE DOS ÉQUIDOS
- M) MODIFICACIÓN DA RESEÑA
- N) IDENTIFICACION DE ÉQUIDOS REXISTRADOS

CUESTIÓNS PREVIAS

1.- Ámbito de aplicación **deste documento**

As actuacións dos veterinarios identificadores autorizados pola Consellería do Medio Rural dentro do convenio asinado co Consello Galego de Colexios Veterinarios para a identificación de animais equinos en Galicia **afectan única e exclusivamente aos animais de crianza e rendemento que se identifiquen en Galicia.**

No caso dos **animais de abasto de menos de 12 meses**, a Consellería do Medio Rural habilitou un sistema de identificación oficial consistente nun **crotal auricular electrónico**. Se o animal vai destinado directamente ao matadoiro desde a explotación de orixe, agás o citado crotal electrónico, non precisará ningún documento de identificación. Pola contra, se antes de

chegar ao matadoiro pasa por un cebadoiro, un mercado ou unha explotación dun tratante, ademais do crotal electrónico, o animal acompañarase dun DIE simplificado.

O titular/ propietario, será quen decida segundo o destino que lle queira dar ao animal (animal de abasto destinado a matadoiro) ou ben animal destinado "a vida" (crianza e rendemento) o tipo de identificación que vai posuir o animal.

Para estes animais, está establecido que o titular/propietario do équido presente **na Oficina Agraria Comarcal correspondente** á explotación de nacemento, a súa solicitude de identificación mediante un modelo normalizado dispoñible nas OAC. Así mesmo, a subministración dos crotais electrónicos e a emisión, no seu caso, do DIE simplificado serán realizadas polas OAC correspondentes. Polo tanto, debe quedar claro que os veterinarios identificadores de équidos de crianza e rendemento non interveñen en ningún momento na xestión da identificación destes animais e por tanto son animais que non se identificarán a través de Siregal.

Para os équidos rexistrados, tanto a identificación inicial dos animais como as posibles xestións posteriores (cambios de propietario, emisión de duplicados, etc), deben ser realizadas polas entidades emisoras autorizadas das razas correspondentes polo que tampouco deben ser xestionados polos veterinarios autorizados a través de Siregal.

As posibles actuacións ou informacións que puideran demandar outras entidades autorizadas para a identificación equina alleas á Consellería do Medio Rural (doutras Comunidades Autónomas ou de entidades emisoras para équidos rexistrados), como por exemplo a comprobación de identidade dos animais ou a emisión de documentos de identificación duplicados para animais de crianza e rendemento xa identificados noutras Comunidades Autónomas deben entenderse como un servizo clínico externo ao citado convenio e polo tanto non son afectadas pola información contida neste documento nin deben ser reflectidas na aplicación SIREGAL.

2.- Concepto de propiedade / titularidade dos animais

A normativa vixente de aplicación indica claramente que o responsable da identificación dos equinos é o "titular do équido" no momento que a identificación se teña que realizar, segundo os prazos de idade esixibles para realizala. Tamén indica a normativa que é por tanto o titular, o responsable de facer a solicitude de identificación do animal ante o organismo emisor do documento de identificación equina (DIE).

O titular defínese como "calquera persoa física ou xurídica que sexa propietaria, posúa ou sexa responsable de coidar ao animal con ou sen fins lucrativos, e a título permanente ou temporal, incluso durante o seu

transporte, en mercados ou durante competicións, carreiras ou actos culturais”.

Por outra banda, o propietario do équido é “calquera persoa física ou xurídica que acredite posuír un équido como ben material propio e que figure como tal na sección correspondente do pasaporte (Sección III, de información sobre o dereito de propiedade).

Na práctica, na meirande parte dos casos, ambas figuras, titular e propietario, coincidirán na mesma persoa física ou xurídica. Porén, existen situacións nas que isto non é así, por exemplo en cortes de pupilaxe ou nos casos de explotacións equinas que alberguen animais de distintos propietarios sen finalidade comercial (por exemplo, unha finca onde residan varios animais propiedade de varias persoas). Moito máis raros serán os casos nos que durante unha competición ou un mercado ou transporte, se dea a necesidade de esixir ao titular a identificación obrigatoria do animal nese preciso momento.

En calquera caso, a normativa vixente de identificación equina indica claramente que “cando o titular non sexa o propietario do animal, actuará en nome e co acordo da persoa física ou xurídica propietaria”.

3.- Significado do Documento de Identificación Equina (DIE)

O DIE/pasaporte en principio **é un documento estritamente de identificación animal**, non un documento de acreditación da propiedade do animal nin da pertenza do animal a unha determinada explotación equina (código REGA). Só nos casos nos que a entidade emisora do DIE así o esixa, deberá facerse constar nel a propiedade do animal.

A Dirección Xeral de Producción Agropecuaria como entidade emisora responsable para os équidos de crianza e rendemento en Galicia, ten determinado que no DIE obrigatoriamente figuren os datos do propietario do animal no momento da identificación así como os datos dos propietarios sucesivos, se os houbera.

PROCEDIMENTO DE IDENTIFICACIÓN

O Consello Galego de Colexios Veterinarios (ben directamente ou a través dos respectivos colexios provinciais) será o encargado da compra, subministro e da xestión e control do material de identificación utilizado polos veterinarios identificadores autorizados: transpondedor (microchip) e Documento de Identificación Equina, basicamente.

A aplicación informática SIREGAL (Sistema de identificación e rexistro equino de Galicia, www.siregal.org), é a ferramenta para a xestión da identificación nos équidos de crianza e rendemento en Galicia, que permite:

- emisión preimpresa da solicitude de identificación de équidos, que debe asinar o titular/propietario do équido.
- gravación dos campos obrigatorios mínimos que deben constar na base de datos autonómica (artigo 8.8 do Decreto 268/2008 e anexo IV do Real Decreto 1515/2009).
- asignación automática dun NPU (Número Permanente Único) para cada animal identificado.
- comunicación de todos os datos recollidos á base de datos autonómica da Consellería do Medio Rural.
- gravación e expedición automática dos datos no DIE.

Esta aplicación informática pode ser utilizada polos veterinarios identificadores vía web ou previa instalación nos seus ordenadores persoais, onde gravarán os datos precisos recollidos no acto clínico da identificación e que obrigatoriamente deben constar na base de datos autonómica. A descarga deses datos a esta base, farase polo veterinario identificador a través dun portal de internet habilitado, no mesmo momento da identificación se hai dispoñibilidade de rede inarámica na propia explotación ou ben a posteriori, pero sempre antes de 7 días dende a data de identificación.

Cos datos recibidos informaticamente, a empresa Cestel, que desenvolveu esta aplicación informática, editará o DIE (elaborado previamente por unha imprenta), e o remitirá adecuadamente cumprimentado¹ a cada Colexio Veterinario provincial, **desde onde se facilitará ou quedará a disposición (segundo a loxística interna que os Colexios consideren)** ao veterinario identificador para a súa entrega ao titular/propietario solicitante.

Na práctica o **procedemento** consistirá en:

1.- O titular do équido contactará (vía telefónica, vía web ou por outros medios) cun veterinario identificador autorizado. Os propietarios/titulares de équidos disporán da relación dos veterinarios identificadores e os seus enderezos e datos de contacto, que previamente consentiron que fosen públicos, a través dos sistemas de información pública dos Colexios Veterinarios. Así mesmo, a aplicación SIREGAL dispón dun acceso público a través de internet onde se atopará esa información. Esta relación de veterinarios, coa mesma información pública, estará tamén dispoñible para os usuarios nas Oficinas Agrarias Comarcais (OAC) da Consellería do Medio Rural.

2.- O titular do équido facilitará ao veterinario identificador os datos necesarios para a cobertura da **solicitude de identificación do/s animal/is**. Esta comunicación de datos poderá facerse por dúas vías:

a) vía telemática a través da aplicación SIREGAL

¹ No DIE unicamente saíran preimpresos os datos de identificación e reseña do animal (Sección I do DIE)

- b) directamente ao veterinario identificador: a maioría dos datos que deben constar na solicitude [datos do titular/propietario, datos da explotación e datos do animal (especie, sexo, cor, data nacemento...)], é posible que poidan ser facilitados polo titular no primeiro contacto co veterinario (vía telefónica por exemplo), co cal este podería acudir á explotación o día da identificación coa solicitude totalmente cuberta. De non ser así, en calquera caso a aplicación SIREGAL permite a impresión do modelo de solicitude, que deberá neste caso ser cuberto integramente de xeito manuscrito no momento da identificación. Tamén é posible cubrir estes datos no caso de que o veterinario leve á explotación un ordenador portátil e unha impresora.

O modelo de solicitude extraíble de SIREGAL permite a solicitude individual dun animal ou ben unha solicitude conxunta para varios animais.

3.- Na explotación, o titular/propietario deberá asinar a solicitude de identificación. Nesta solicitude, o titular/propietario declara que:

- a) coñece, como titular/propietario, a súa obriga de identificar o animal.
- b) consente a cesión dos datos que constan na solicitude a ficheiros automatizados de acordo coa Lei Orgánica 15/1999 de protección de datos de carácter persoal.
- c) no caso de que o animal fora xa posuidor dun Libro de Identificación e Sanidade Equina (LISE) expedido anteriormente, se achegará (ou informará ao propietario, se non fora el, de que debe achegarse) á Oficina Agraria Comarcal correspondente á explotación onde reside o animal, co fin da supervisión da documentación de identificación do animal polos Servizos Veterinarios Oficiais (SSVVOO).
- d) todos os datos declarados son certos. Este punto é importante nos casos de explotacións que alberguen animais de varios propietarios, de cara a posibles responsabilidades (sinistros provocados polos animais ou outros), nas que ante un conflito o titular ou o propietario do animal pretenderan derivar cara ao outro as responsabilidades as que tiveran que facer fronte.

Como se indica no punto 1 deste documento, debe entenderse que a decisión da identificación dun équido naqueles casos nos que non coincidan propietario e titular conta en todos os casos co acordo do propietario, actuando o titular na súa representación. Por precaución, o veterinario identificador debe informar ao titular destes extremos. No caso de que existan reticencias por parte do titular, o que procede é que sexa o propietario do équido quen solicite e asine a solicitude de identificación do seu animal.

Esta mesma solicitude pode servir tamén de xustificante da actuación de identificación do veterinario ante o titular/propietario, para o cal no modelo de solicitude figura tamén a sinatura do veterinario, de xeito que, se así o desexa o veterinario ou llo demanda o titular/propietario, pode preimprimir dúas copias da solicitude, deixando unha en poder deste.

Así mesmo, a solicitude incorpora a reseña do animal, o que posibilita a súa cobertura na explotación e posterior traslado da información á silueta en SIREGAL. Tamén sería posible a cobertura directa da reseña a través da aplicación SIREGAL se na explotación o veterinario dispón dun ordenador portátil.

4.- O veterinario implantará o microchip inxectable no terzo anterosuperior esquerdo do pescozo, baixo o ligamento da caluga. Previamente deberá comprobar que non existe outro microchip anteriormente implantado, e/ou que non existen signos de extracción cirúrxica deste. **En ningún caso se implantará un microchip a un animal que xa tivera implantado outro anteriormente.**

5.- O veterinario cobre en SIREGAL todos os campos necesarios e envía os mesmos vía telemática. A aplicación dispón de filtros que obrigan a unha cobertura correcta destes datos. Así mesmo permite a gravación informática da reseña morfolóxica do animal e do punto de aplicación do microchip, que serán transcritos automaticamente ao DIE.

6.- A aplicación SIREGAL imprimirá directamente os datos que constan na Sección I. No punto (8) do Parte A desta Sección I, "Nome e enderezo do destinatario do documento", figurará a persoa que asinou a solicitude de identificación.

7.- Unha vez impreso o DIE, este é remitido polo Colexio de Veterinarios da provincia correspondente ao veterinario identificador, quen **cubrirá o punto (11) (selo e sinatura do veterinario) da Parte B da Sección I (datos de identificación) do DIE.**

8.- Antes da entrega do DIE ao titular/propietario o veterinario identificador **deberá xestionar a información das seccións III e IX do DIE:**

a) Sección III (Información sobre o dereito de propiedade)²: o veterinario cubrirá a primeira anotación desta sección no DIE, a partir dos datos do propietario que constan na solicitude de identificación. Se o propietario está presente nese momento, asinará esta

² Para os casos dos primeiros équidos identificados desde a posta en funcionamento deste sistema, nos que seguindo a versión inicial deste documento, se indicaba que a cobertura dos datos do propietario na Sección III debería facerse sempre na Oficina Agraria Comarcal, cómpre informar que nestes casos, nos que esa Sección III non estará cuberta, o propietario debe achegarse á citada OAC coa solicitude de identificación inicial que asinou no momento de identificar o équido, onde se cubrirá esta Sección III.

sección. Se non está presente, o veterinario cubrirá igualmente a totalidade dos datos (data, nome, enderezo, DNI e nacionalidade do propietario e sinatura e selo do veterinario (a sinatura e selo irán no apartado "Selo da organización, asociación ou servizo oficial e sinatura" non sendo por tanto necesario engadir nesta Sección ningún outro selo do Colexio Oficial Veterinario ou da Xunta de Galicia) e indicará ao titular que o propietario debe asinar esta sección. No apartado de "data de rexistro pola organización, asociación ou servizo oficial" anotarase a data de identificación do animal.

b) Sección IX (Administración de medicamentos veterinarios): o veterinario identificador debe informar ao titular/propietario das distintas posibilidades en canto a aptitude do animal para consumo humano.

- **Se o titular/propietario decide que o animal non sexa destinado a consumo humano** ao final da súa vida, **este debe cubrir e asinar obrigatoriamente a Parte II da Sección IX** (data, lugar, nome en maiúsculas e sinatura do titular/propietario). **Esta sinatura implica a inhabilitación para consumo humano de xeito permanente, independentemente de que o animal cambie de propietario, polo que é extremadamente importante que o veterinario lle informe convenientemente para que o propietario/titular coñeza perfectamente o alcance da súa decisión.**

O veterinario identificador non cubrirá a última cela (nome e sinatura do veterinario responsable de conformidade co artigo 10(2) da Directiva 2001/82/CE) pois esta parte está reservada para o caso de administración, en calquera momento, de substancias que inhabiliten de xeito permanente ao animal para o consumo humano.

- **Se o titular/propietario decide que o animal sexa destinado no futuro a consumo humano, esta Sección IX quedará sen cubrir.**

9.- Os datos recollidos en SIREGAL son comunicados automaticamente á base de datos autonómica, que se trasladarán tamén automaticamente á base de datos central no Ministerio de Medio Ambiente e Medio Rural e Mariño.

Coa finalización destas actuacións, o équido quedará identificado e rexistrado oficialmente.

OUTROS ASPECTOS DE INTERESE

A) SOLICITUDE DE IDENTIFICACIÓN

O veterinario identificador entregará a solicitude orixinal asinada polo titular/propietario no Colexio Veterinario onde estea colexiado. Neste colexio procederáse ao seu arquivo e custodia.

B) CAMBIOS DE PROPIETARIO

Esta xestión levarase a cabo nas OAC da Consellería do Medio Rural.

O novo propietario dispón dun prazo de **30 días hábiles³** desde que se produce o cambio de propiedade para comunicar este feito á OAC correspondente. Para este trámite presentará na OAC o DIE e máis a documentación acreditativa da súa adquisición (documentación dispoñible nas OAC).

En SIREGAL constan os datos do propietario do animal no momento da identificación. Cando existan cambios de propietario posteriores, eses cambios non van a constar de momento en SIREGAL de xeito automático polo que cando os novos propietarios precisaran solicitar a emisión dun DIE duplicado ou substitutivo, deberán acreditar ante o veterinario identificador a propiedade do animal. Para iso, presentarán a documentación acreditativa deste feito mediante un modelo normalizado de cambio de propiedade dispoñible nas OAC e que virá selado pola OAC onde resida o animal.

C) EMISIÓN DUN DOCUMENTO DE IDENTIFICACIÓN EQUINA DUPLICADO

Emitirase un duplicado cando en caso de perda ou deterioro do anterior DIE, se poda acreditar por algún medio (lectura do microchip xeralmente) a identidade do animal.

O titular/propietario debe poñerse en contacto cun veterinario identificador que, tras facer as comprobacións oportunas, realizará as xestións para a expedición dun novo DIE duplicado segundo o sistema xeral descrito neste documento. **Previamente deberá ter cuberto o modelo de solicitude de emisión dun documento duplicado que pode extraer de SIREGAL.**

O veterinario recibirá o DIE duplicado polo sistema normal. Este novo DIE é idéntico ao orixinal coa única diferenza de que na portada do mesmo figura a lenda **“DUPLICADO DO DOCUMENTO DE IDENTIFICACIÓN EQUINA”** que xa virá preimpreso desde a imprenta.

³ É necesario lembrar que a obriga de comunicar o cambio de propietario no DIE (30 días) é independente da obriga de comunicación de movementos de entrada ou saída de animais das explotacións (7 días máximo), polo que aconséllase que no caso de que o cambio de propietario signifique tamén un cambio de explotación equina, ambas xestións se fagan no mesmo prazo (7 días).

Previamente a realizar a emisión de duplicado a través de SIREGAL o veterinario autorizado deberá aclarar a situación do animal respecto á súa situación de aptitude para o consumo humano.

- Se o animal xa figuraba na base de datos SIREGAL como non apto para o consumo humano, na solicitude de duplicado sinalarase esta opción.

- Se o animal figuraba en SIREGAL como apto para o consumo humano, o veterinario informará ao titular de que existen dúas opcións, con motivo da emisión do duplicado:

a) Declarar o animal definitivamente como non apto para o consumo humano; se o titular opta por esta posibilidade, o veterinario marcará esta opción na solicitude de duplicado e en SIREGAL.

b) Suspender temporalmente a aptitude para o consumo humano durante un período de seis meses, se se acredita ante os Servizos Veterinarios Oficiais que o animal non recibiu tratamentos que o inhabiliten para ese destino; se o titular opta por acreditar esta opción, o veterinario non marcará na solicitude de duplicado a opción de non apto para o consumo humano.

O veterinario identificador recibirá o DIE duplicado polo sistema habitual. Este novo DIE é idéntico ao orixinal coa única diferenza de que na portada do mesmo figura o texto **"DUPLICADO DO DOCUMENTO DE IDENTIFICACIÓN EQUINA"** que xa virá preimpreso desde a imprenta.

No caso de que o animal xa figurara en SIREGAL como non apto para o consumo humano, ou se ao emitir o duplicado o titular/propietario acepta que non sexa destinado ao consumo humano, o veterinario identificador **cubrirá as tres primeiras celas da Parte II da Sección IX do DIE** indicando a data, lugar, nome e DNI do titular/propietario, sendo necesario que **este firme esta sección, e quedando o animal inhabilitado para o consumo humano de xeito permanente**, independentemente de que o animal cambie de propietario. O veterinario identificador **marcará o animal en SIREGAL como non apto para consumo humano.**

Se o titular/propietario optou pola posibilidade da suspensión temporal da aptitude para o consumo humano, **o veterinario informalle de que debe pasar pola OAC nun prazo de 30 días desde a data da perda do DIE orixinal** co obxecto de acreditar que o animal non ten recibido tratamentos que o inhabiliten para ese destino. Neste caso, **o veterinario identificador non cubrirá a Parte II nin a Parte III da Sección IX do DIE, nin gravará en SIREGAL información algunha sobre a aptitude para o consumo. Siregal comunicará á Consellería do Medio rural polos medios que se establezan que foi emitido un documento duplicado**, sinalando a data da solicitude, o NPU do équido e os datos do titular/propietario, así como a explotación na que se atopa o animal. Deste xeito os servizos veterinarios oficiais poderán facer un control, se fora necesario, para garantir que finalmente os titulares/propietarios dos DIE

duplicados realizan esta xestión nas OAC e que estes DIE son cubertos correctamente na Sección IX.

Segundo a valoración dos SSVVOO da OAC nese prazo, sobre a acreditación que presente o propietario/titular de que o animal teña ou non recibido tratamentos que afecten ao consumo humano, decidírase na OAC marcar o animal como apto para consumo humano pero cun período de suspensión desa aptitude de 6 meses desde a data de emisión do documento duplicado ou ben determinar irreversiblemente a non aptitude do animal para consumo humano de por vida. Segundo isto, **na OAC cubrirán a Parte III da Sección IX indicando ese período de supresión** ou ben a **Parte II da dita Sección, coa sinatura do propietario/titular, no caso de inaptitude para consumo de xeito irreversible.**

Se despois da emisión do documento duplicado aparecera o DIE orixinal, o propietario debe achegarse á OAC cos dous DIE (orixinal e duplicado), onde o DIE orixinal será retido e invalidado na OAC.

No caso de que a emisión dun duplicado se deba a un deterioro do DIE orixinal, o veterinario indicará ao solicitante que deberá achegarse á OAC co DIE deteriorado para que os SSVVOO comprobén os datos que constan neste. Na OAC invalidarán o DIE deteriorado e o devolverán ao solicitante ou ben poderán trasladar ao novo DIE a información que constara no DIE orixinal retirando e destruíndo este.

D) EMISIÓN DUN DOCUMENTO DE IDENTIFICACIÓN SUBSTITUTIVO

Emitirase un DIE substitutivo cando:

- en caso de perda ou deterioro non se poda acreditar por ningún medio a identidade do animal, **independentemente de que o équido puidera ser un équido rexistrado⁴.**

- no caso de que o veterinario identificador confirme a extracción dun transpondedor previo e non se poda acreditar a identidade do mesmo.

O propietario debe poñerse en contacto cun veterinario identificador que, tras facer as comprobacións oportunas, realizará as xestións para a expedición dun novo DIE substitutivo segundo o sistema xeral descrito neste

⁴ **Os documentos substitutivos os emite a entidade emisora para équidos de crianza e rendemento da Comunidade Autónoma onde resida o équido**, polo tanto eses animais aínda que supostamente foran rexistrados, a efectos de identificación oficial pasan a ser considerados como de crianza e rendemento e polo tanto se lles expedirá un DIE segundo o procedemento xeral deste documento a través dos veterinarios identificadores autorizados. O animal poderá ser inscrito, se así o desexa o seu propietario no libro xenealóxico que se trate pero seguirá identificado oficialmente con un DIE de crianza e rendemento.

documento. **Previamente deberá ter cuberto o modelo de solicitude de emisión dun documento substitutivo que pode extraer de SIREGAL.**

O veterinario recibirá o DIE substitutivo polo sistema normal. Este novo DIE é idéntico ao orixinal coa única diferenza de que na portada do mesmo figura a lenda "**DOCUMENTO DE IDENTIFICACIÓN EQUINA SUBSTITUTIVO**" que xa virá preimpreso.

Na aplicación informática SIREGAL o veterinario identificador gravará a información de expedición dun DIE substitutivo (emisión de substitutivo e data da mesma) e **marcará en calquera caso ao animal como non apto para o consumo humano.**

Para iso, **o veterinario cubrirá as tres primeiras celas da Parte II da Sección IX** indicando data, lugar e nome e DNI do titular/propietario, e **este obrigatoriamente ten que asinar esta parte.**

O veterinario debe informar ao titular/propietario que o animal en ese momento queda declarado como non apto para consumo humano de xeito permanente independentemente de que o animal cambie de propietario no futuro e que así consta na base de datos autonómica. Neste caso non hai posibilidade de reverter esta situación.

Se despois da emisión do documento substitutivo aparecera o DIE orixinal o propietario debe achegarse á OAC cos dous DIE (orixinal e duplicado), e o DIE orixinal será retido e invalidado na OAC.

Cómpre informar que no caso de emisión dun documento substitutivo, ao non poder comprobar a identidade do animal, a todos os efectos trátase dun animal novo polo que **SIREGAL asignará sempre un novo NPU a ese équido**, aínda que o propietario manifeste coñecer o NPU inicial do mesmo.

E) RETRASO NA ENTREGA DOS DIE

En condicións normais desde a data de identificación ata que o DIE está en poder do titular/propietario poden transcorrer 15 días.

No caso de que o titular/propietario precise realizar un movemento do animal con retorno á explotación de orixe (por exemplo asistencia a un evento equino) dentro de territorio galego antes de ter o DIE no seu poder, deberá comunicar tal circunstancia na OAC no momento de solicitar a Guía de Orixe e Sanidade Pecuaria, onde se habilitará ese movemento sempre que se acompañe da solicitude de identificación completamente cuberta cos datos do animal e a sinatura do propietario/titular e do veterinario identificador.

No caso de movementos fóra do territorio galego, o titular deberá contactar cos servizos veterinarios oficiais da Comunidade Autónoma de destino co fin de verificar se esta autoriza o movemento **destes animais que aínda non posúen fisicamente o DIE**. Neste caso desde a OAC de orixe, no momento da emisión da Guía de Orixe e Sanidade Pecuaria, contactarase coa oficina veterinaria de destino para confirmar a posibilidade de realizar o dito movemento **e o tipo de documentación requirida por esta, como acreditativa da situación do animal en canto a súa identificación**.

F) XESTIÓN DA IDENTIFICACIÓN EN ANIMAIS CON LISE

A Consellería do Medio Rural decidiu expedir igualmente un DIE, acorde coa normativa vixente, a todos aqueles animais que xa dispuxeran dun LISE expedido polas OAC con anterioridade á entrada en vigor da actual normativa de identificación **(1 de xullo de 2009)**.

Nestes casos por tanto, **a identificación rexerese segundo a pauta xeral descrita neste documento: implantación do microchip e expedición dun DIE novo**.

O veterinario identificador debe informar ao titular/propietario de que debe pasar pola OAC correspondente co LISE antigo e máis o DIE co fin de supervisar a documentación de identificación do animal polos servizos veterinarios oficiais.

O NPU válido do animal será o xerado pola aplicación Siregal coa codificación 724911..., porén e só a efectos de arquivo e trazabilidade dos animais, na aplicación gravarase, no campo NPU-LISE, tamén a codificación antiga que posuía (codificación 724CRU...).

G) XESTION DA IDENTIFICACIÓN EN ANIMALES QUE XA POSÚEN LISE E MICROCHIP

Para **animais identificados con microchip e LISE antes do 1 de xullo de 2009** (data de entrada en vigor do Regulamento (CE) 504/2008 sobre identificación equina), **non será necesaria a expedición dun novo DIE** ; por tanto estes animais conservarán o microchip que porten e o LISE que lles foi expedido no seu momento polos Servizos Veterinarios Oficiais.

Nestes casos o veterinario identificador deberá **unicamente indicar ao titular/propietario que debe achegarse á OAC** correspondente á explotación onde resida o animal co fin de incorporalo á base de datos galega de identificación equina.

Os animais identificados con microchip e LISE con posterioridade ao 1 de xullo de 2009, conservarán o microchip que porten pero deberánlles expedir novo DIE , segundo o procedemento xeral indicado neste documento.

H) XESTIÓN DE ANIMAIS IDENTIFICADOS PREVIAMENTE CON LIBRO DE IDENTIFICACIÓN CABALLAR (LIC)

Aínda que no seu día a Consellería do Medio Rural realizou actuacións encamiñadas a adecuar á Decisión 2000/68/CEE os LICs emitidos pola Real Federación Hípica Española ou as súas filiais en cada Comunidade Autónoma, incorporando un anexo coa Sección IX de administración de medicamentos veterinarios, e asignando un número de rexistro individual conforme á codificación determinada naquel momento para os équidos de crianza e rendimento (724CRU...), **estes documentos de identificación non serán considerados válidos**, por non estar estas entidades recoñecidas como organismos emisores de documentos de identificación e non dispor de UELN. Ademais estes documentos expedidos polas Federacións Hípicas non son recoñecidos como documentos de identificación oficial no resto do Estado.

Polo tanto, os titulares/propietarios de équidos que dispoñan destes documentos deberán solicitar aos veterinarios autorizados a emisión dun novo DIE, sendo identificados cun inxectable electrónico (se non o tiveran xa), asignándoselles un novo NPU e incluíndo os seus datos na base de datos de SIREGAL. No caso de que o LIC fora validado no seu día pola CMR, figurará na base de datos o NPU antigo (724CRU...) a efectos de trazabilidade e arquivo.. No seu caso, o anterior LIC quedará en poder do titular/propietario do animal.

Unicamente a efectos informativos, cómpre indicar que postos en contacto co Ministerio de Medio Ambiente e Medio Rural e Mariño e coa Federación Hípica Galega, informaron de que as Federacións Hípicas, entidades emisoras dos LIC, non se van a constituír no futuro en entidades emisoras de documentos oficiais de identificación equina, aínda que van a seguir expedindo o LIC como documento de tenza obrigatoria para a asistencia aos concursos hípicos por eles promovidos. Polo tanto, estes animais posuirán un DIE expedido segundo o procedemento xeral a través dos veterinarios identificadores autorizados como équidos de crianza e rendimento e un LIC no caso de que desexen participar nesas competicións hípicas.

I) OUTROS SISTEMAS DE IDENTIFICACIÓN

Como xa se indica no punto 1, de ámbito de aplicación deste documento, cómpre recordar que a Consellería do Medio Rural, ten habilitado un **sistema de identificación equina con crotal auricular electrónico** que será subministrado nas OAC aos solicitantes e que só será aplicado a **équidos menores de 12 meses destinados a abasto** e nados en explotacións de produción e reprodución de carne. Este sistema é un sistema perfectamente legal como identificación oficial segundo a normativa vixente.

J) DILIXENCIADO E REVALIDACIÓN DOS DIE

Como información adicional comunícase que non é necesario o dilixenciado inicial do DIE e a súa revalidación bianual polos Servizos Veterinarios Oficiais nas OAC. Tampouco será necesaria a revalidación bianual do resto de pasaportes doutras entidades emisoras (équidos rexistrados ou équidos de crianza e rendemento doutras Comunidades Autónomas).

K) INFORMACIÓN SOBRE DOCUMENTACIÓN DE MOVIMIENTO DOS ÉQUIDOS.

Os animais correctamente identificados segundo este documento poderán moverse polo territorio da Comunidade Autónoma de Galicia co "documento de identificación equina" (DIE, pasaportes de équidos rexistrados) como único documento identificativo e de acompañamento, e non precisarán por tanto de acompañarse da Guía de Orixe e Sanidade Pecuaria.

Cando se despracen (ben para vida ou ben para matadoiro directamente ou previo paso por mercado, explotación de trato ou cebadeiro) fóra de Galicia, ou entren en Galicia con calquera destino, nun movemento nacional, deberán ademais de dispor da documentación de identificación equina, da correspondente autorización sanitaria oficial de movemento (Guía de Orixe e Sanidade Pecuaria xeralmente).

Cando o movemento de entrada ou saída de Galicia sexa en relación con outro país membro da Unión Europea, os animais deberán ir acompañados do documento de identificación equina e do certificado sanitario para movemento intracomunitario que lle expedirán no servizo veterinario oficial de orixe.

Porén, os équidos de abasto de menos de 12 meses nados en explotacións de produción e reprodución para produción de carne que se trasladen con destino directo a matadoiro, poderán moverse sen dispor do DIE, e unicamente precisarán a correspondente autorización oficial de traslado na que constarán polo menos os 15 últimos díxitos do microchip e o seu NPU.

L) INFORMACIÓN SOBRE MORTE DOS ÉQUIDOS

No caso de sacrificio dos équidos nun matadoiro ou ben no caso de morte accidental nunha explotación, os responsables dos matadoiros ou das industrias de transformación de subprodutos onde cheguen os cadáveres dos animais mortos en explotación, procederán a comunicar a baixa destes animais á Dirección Xeral de Producción Agropecuaria (DXPA) para a incorporación dos datos da morte na base de datos autonómica.

Está establecido con estes axentes, un dispositivo para a invalidación e destrución tanto dos microchips como dos DIE que posúíran estes animais.

No caso de que se trate de équidos rexistrados ou de crianza e rendemento identificados noutras comunidades autónomas, desde a DXPA comunicaranse estas baixas as entidades que emitiron esa documentación de identificación.

No caso de équidos que desaparezan (ataques de lobo, **équidos dos que non se puido recoller o cadáver (accidentados en zonas inaccesibles) ou équidos identificados sacrificados na explotación.** O propietario, nun prazo de 30 días naturais debe notificar a baixa do animal na OAC correspondente á explotación na que estea localizado, presentando o DIE. No caso de équidos identificados sacrificados na explotación para autoconsumo, o titular debe entregar tamén o transpondedor recuperado.

M) MODIFICACIÓN DA RESEÑA ⁵

Cando fora necesaria ao longo do tempo de vida do animal, a modificación da reseña no DIE, a consecuencia de modificacións na fisonomía do équido (cambios de cor, marcas corporais, etc...), está previsto que sexa posible trasladar esas modificacións ao DIE polo veterinario que as constate (que non ten por que ser o veterinario identificador que realizou a identificación inicial).

As dúas posibilidades de actuación, **aínda sen concretar** serían:

- anotar manualmente no DIE os cambios na Parte A e B da Sección I (na reseña gráfica con tinta vermella), e no punto 11) nun apartado novo denominado "Modificación de reseña" o veterinario anotará a data, e o seu nome, selo e sinatura.
- substitución da reseña gráfica do DIE por unha pegatina ca silueta do animal na que se actualizarían os datos morfolóxicos e que estará selada, e datada polo veterinario identificador que asente os cambios. Así mesmo, o veterinario asentaría os seus datos no apartado "Modificación de reseña".

As modificacións producidas no DIE deberán ser tamén actualizadas informaticamente en SIREGAL.

N) IDENTIFICACION DE ÉQUIDOS REXISTRADOS

Na introdución deste documento indícase claramente que é de aplicación exclusivamente para os équidos de crianza e rendemento que se identifiquen

⁵ Este punto **é meramente informativo pois aínda non está decidido definitivamente como se vai a proceder nestes casos.** A data de hoxe non é posible pois o modelo actual de DIE non admite a incorporación de pegatinas e aínda non se ten incluído un apartado de modificación de reseña na Parte B da Sección I. Na seguinte tirada de DIE pola imprenta se incluíría ese novo punto.

na Comunidade Autónoma de Galicia, mentres que para os équidos rexistrados, son as entidades de identificación autorizadas (xeralmente as responsables do libro xenealóxica da raza), as competentes nesta materia.

A data de hoxe, seguen sen estar resoltos algúns aspectos da xestión da identificación dos équidos rexistrados e sobre todo aqueles que pertencen a razas que non dispoñen de libro xenealóxico e/ou persoal técnico propio en España, o que dificulta enormemente as xestións de identificación.

A nivel do Ministerio de Medio Ambiente e Medio Rural e Mariño se ten realizado xestións para o intercambio de información a nivel informático desde as entidades emisoras de équidos rexistrados e o Ministerio, onde radica a base de datos estatal de équidos residentes en España. Porén, respecto aos documentos de identificación, a postura do Ministerio é que esta xestión debe ser resolta exclusivamente polas propias entidades emisoras.

Podemos atopar varias situacións:

a) Se un équido rexistrado foi identificado conforme á lexislación vixente anterior á publicación do Regulamento (CE) 504/2008 (publicado o 07/06/2008), considérase adecuadamente identificado a día de hoxe, polo que non debería realizar ningunha xestión de actualización. A variabilidade de documentación expedida ata a data polas entidades emisoras e grande polo que sería necesario valorar a documentación caso por caso.

b) Se o animal foi identificado con anterioridade a esa data pero o seu pasaporte non é acorde coa citada normativa vixente anterior ao Regulamento (CE) 504/2008, pode ter dúas posibilidades:

- contactar coa entidade que o emitiu para que lle indiquen como debe proceder para adecuarse á normativa actual.
- decidir identificar oficialmente o seu animal como de crianza e rendimento, para o cal seguiría o procedemento xeral deste documento. Ese animal quedaría a todos os efectos e de por vida considerado como un équido de crianza e rendimento. A posibilidade de que ese animal posuía outra documentación (certificado xenealóxico, probas xenéticas ou outros) acreditativa da pureza da súa raza é unha competencia da entidade competente no libro xenealóxico da mesma.